



ZEILAN ET LES ISLES

A LA VILLE DE MADRIVEVA



*Opinion du
Paradis ter-
restre.*

ANS le goüé de Bangala y a vne Isle appellée Zeilan, & par les habitans Arabes, Tenarism ou Ternasseriz, c'est vn plaisant país. Les Indiens l'appellent Hibernaum. Le circuit est de 240. lieües, ou selon que les autres de 200. ou 700. milles. Quelques vns estiment que ç'a esté par cy deuant vne partie continente de la terre ferme où est située la ville de Cael, d'autant que la mer qui court entre-deux est estroite, & peu profonde. L'air y est temperé & agreable, tellement qu'il y en a qui pensent que le paradis terrestre auroit esté en ce lieu, le terroir y est extremement fertile, & toujours verd, les arbres y fleurissent & y portent toujours des fruits fort faououreux; comme des pommes d'Assirie d'incroyable douceur, des citrons, &c. Il y a force espiceries de toutes les sortes & de fort bonnes. La chair & le poisson y est en grande abondance, mais il n'y a point beaucoup de ris, mais on en apporte du país de Coromandel, il y a aussi grande quantité d'Elephãs fort faciles à apprendre, & les mene-on de là ailleurs. Les perles & autres pierres precieuses se transportent de là en grande quantité aux autres peuples & nations, cela apporte vn tresor inestimable à toute l'Isle. Les habitans sont moitié Payens, & moitié Mahumetans, ils sont de couleur blanchastre, de grande stature, ont de gros ventres, & sont ordinairement gras & bien nourris, ils sont fort addonnez à leurs plaisirs, depuis la teste iusques au milieu du corps, ils vont tous nuds, & la partie d'embas est couuverte d'habits de soye ou de coton, ils ont aussi vne fine couuerture sur leurs testes, portent des pendans d'oreilles, d'or & de perles, leurs ceintures sont d'or enrichies de perles precieuses, ils ne sont point addonnez à la guerre, aussi n'ont ils point de courage, n'vont point d'arquebuses, ny de fer pour leurs armes, mais ont seulement des roseaux. Il y a eu iadis quatre Roys, qui estoient Payens, mais à present l'Isle est diuisee en neuf Royaumes, desquels le principal est Colmuchi, lequel reçoit tribut des autres, à sçauoir de Ianafapitan, Triquinamale, Batacolon, Vilassem, Tananaca, Lauza, Galle, & Cande. Au reste l'Isle est fort commode au traficq, il y a sept haures pres desquels il y a de tresbelles villes, desquelles la principale est Colmuchi, où on charge beaucoup de nauires d'Elephans, & de perles. Les Portugais ont vn chasteau en ceste ville. Cecy escrit touchant l'Isle de Zeilan vn certain Cosmographe Italien nommé Io. Antonius Maginus, mais Iean Huyghen de Linchote escrit que les naturels habitans, qu'il nomme Chingalos, sont fort ingenieux, & industrieux à ouurer en or, argent, yuoire, fer & autres metaux en telle sorte qu'ils emportent le pris par dessus les autres nations. Ils font les plus beaux & meilleurs Canons qu'on sçauoit trouuer, on diroit qu'ils sont faits au tournoir, & d'argent. Ceste Isle donc est vne des plus singulieres de toutes les Isles Orientales en beauté & plaifance.

Canons.